

Programska platforma koalicije
„Naša travnička priča“
za prijevremene izbore za načelnika
Travnika

Narod i pravda
Socialdemokratska partija
Naša stranka

Uvod

U sljedećim poglavljima obrazložene su prioritetne oblasti i principi djelovanja koalicije „Naša travnička priča“ na lokalnom nivou. Navedeni su osnovni principi rada i pravci djelovanja predstavnika koalicije u cilju uspostave pravičnog sistema a, pored toga, prioritet koalicije su i „lokalna pitanja“ koja smatramo izuzetno važnim, čak i u kontekstu ukupne politike i pitanja državotvornosti. Ona se direktno reflektuju na kvalitet života građana i najčešće utječu na odluku o ostanku ili odlasku iz zemlje, što je danas vjerovatno izazov jedan za našu domovinu.

Koalicija „Naša travnička priča“ je programski orientirana politička organizacija kojoj je cilj osiguranje vladavine pravne države kroz neselektivnu i dosljednu primjenu zakona u Bosni i Hercegovini, borba protiv vladavine stranaka, njihovih moćnika i povlaštenih familija i insistiranje na vladavini zakona i pravednih institucija, poštujući jasne principe koalicije koji su navedeni u nastavku, prioritete zajednice radeći na konkretnim projektima koji donose dobrobit u svakodnevnom životu.

1 Principi rada i pravci djelovanja

Osnovni principi rada i pravci djelovanja predstavnika koalicije „Naša travnička priča“ su navedeni u nastavku

1.1 Borba protiv korupcije i transparentnost rada

Osnovni ciljevi:

- Strateška institucionalna borba protiv korupcije
- Proaktivna transparentnost
- Politička etika i profesionalno ponašanje izabranih i imenovanih dužnosnika i administracije
- Intenzivna saradnja s pravosudnim i drugim nadležnim institucijama

Koalicija „Naša travnička priča“ će se boriti protiv poštasti korupcije, nečasnih pojedinaca i kriminalnih grupa koji su umiješani u koruptivne radnje ili ih predvode. Gdje god nam građani omoguće politički kapacitet da to učinimo, provest ćemo reviziju i analizu rada prethodne lokalne vlasti, institucionalno i u skladu sa zakonom. Držimo da građani najmanje što zaslužuju jeste da znaju kako se trošio i kako će se trošit njihov novac. Svaki oblik nezakonitosti će biti evidentiran i prijavljen nadležnim institucijama radi procesuiranja. Nećemo dozvoliti da pljačka naroda ostane nekažnjena. Koalicija „Naša travnička priča“ ne zagovara revanšizam, već zaštitu i spašavanje naroda i države od korumpiranih pojedinaca i grupa, kao i nestručnih kadrova, čiji se rezultati djelovanja i materijalnofinansijske posljedice mogu porediti sa ratnim destrukcijama. Podizat ćemo i standarde poslovne etike i profesionalnog ponašanja među zaposlenima u općinskim upravama, kroz propisivanje i unapređivanje internih pravila i kodeksa, edukaciju i nadzor. Sa krajnjom ozbiljnošću pristupat ćemo nalazima državne revizije i inspekcija, te postupati po revizorskim preporukama i inspekcijskim nalozima.

Koalicija „Naša travnička priča“ će insistirati na proaktivnoj transparentnosti u radu svojih predstavnika u općinskim vijećima i upravama. Sve značajne informacije bit će javno i pravovremeno obznanjene i promovirane putem svih dostupnih kanala komunikacije općine (web-stranice, društvenih mreža, medija): donošenje budžeta, javne nabavke, konkursi, javni pozivi, faze implementacije značajnih projekata, važna dešavanja i aktivnosti itd. Unapređivat ćemo koncept javne rasprave i komunikacije sa građanima, sa ciljem pravovremenosti u dostavljanju bitnih informacija, kao i prikupljanja sugestija i informacija sa terena, te adekvatnog postupanja po njima. Gajit ćemo princip da između općine i građana nema tajni, u svim procesima koji su od značaja za njih.

Sarađivat ćemo sa nadležnim institucijama svih nivoa vlasti na prevenciji ove poštasti, kao i akcijama suzbijanja. Aktivno ćemo učestvovati u donošenju strateških dokumenata i provedbenih planova za borbu protiv korupcije. Svoju opredjeljenost pokazivat ćemo i kroz donošenje i provedbu internih propisa koji za cilj imaju povećanje transparentnosti rada općine. Koristit ćemo informacione tehnologije i savremene sisteme u ovoj oblasti. Zalagat

ćemo se za uspostavu registra zaposlenih na nivou općine, kao i registra imenovanih lica u upravljačkim organima. Kontinuirano ćemo unapređivati i jačati sisteme kontrole javnih nabavki. Također, gdje god nam bude dozvoljavao izborni kapacitet, uspostaviti ćemo i općinske registre poticaja i grantova, kao jedinstvenih baza podataka koje bi bile javno dostupne i sadržavale sve relevantne informacije o dodjeli ove vrste sredstava, a prvenstveno sa ciljem sprječavanja „poduplavanja“ dobijanja poticaja od više institucija po istom osnovu i drugih vrste zloupotrebe.

Poseban fokus stavit ćemo na prevenciju zloupotreba od strane izabranih vijećnika i čelnika izvršnih organa lokalne vlasti, posebno u kontekstu sprječavanja pribavljanja nezakonite koristi sebi i svojim srodnicima, stranačkim kolegama, prijateljima, različitim interesnim grupama i sl., a posredstvom funkcije koju obavljaju. Sa svim oblicima korupcije i nepotizma obračunavat ćemo se bez kompromisa.

1.2 Fokus na budžet

Osnovni ciljevi:

- Racionalizacija troškova rada administracije
- Maksimiziranje sredstava za razvoj
- Programski budžet
- Participacija struke i građana u procesu kreiranja i donošenja budžeta

Budžet će biti ogledalo ciljeva naše politike i sredstvo garancije da obećanja i projekti neće biti lažni i ostati samo mrtvo slovo na papiru. Strateško opredjeljenje koalicije „Naša travnčka priča“ je racionalizacija troškova administracije i približavanje procentu izdvajanja za troškove administracije prema evropskim standardima, te maksimiziranje sredstava za razvojne komponente budžeta: finansiranje infrastrukturnih projekata sa ciljem razvoja, ulaganja u mlade i razvoj ljudskih kapaciteta, obrazovanje, inovacije i tehnološki razvoj, te jačanje socijalnih komponenti u skladu sa realnim prioritetima i potrebama građana. Naši budžeti bit će programski, temeljeni na strateškim dokumentima općine, analizama i projekcijama struke.

Istovremeno, unaprijedit ćemo proces kreiranja i donošenja budžeta u kontekstu njegove transparentnosti, otvorenosti i dostupnosti, pravovremenosti, prikupljanja i selekcije prijedloga struke, građana i vijećnika, te uvažavanje i prihvatanja prikupljenih prijedloga prilikom finalizacije budžeta, u skladu s utvrđenim prioritetima i realnim mogućnostima. Iz korijena ćemo promijeniti praksu da lokalna vlast ima ekskluzivitet izrade budžeta prema vlastitim prohtjevima i ličnim interesima, bez konsultacija i stvarnog uvažavanja potrebe građana i programske prioritete.

1.3 Reforma općinske administracije

Osnovni ciljevi:

- Kontinuirana edukacija
- Modernizacija radnih procesa

- Depolitizacija
- Pristupačnost građanima
- Digitalna transformacija javne uprave

Lokalnu samoupravu vidimo kao temelj naprednog demokratskog društva, jer je riječ o vidu neposrednog ostvarivanja prava građana da učestvuju u upravljanju javnim poslovima. Prema tome, želimo je organizirati po uzoru na evropske samouprave, efikasne i bliske građanima. Stručna, moderna, profesionalna i depolitizirana javna uprava je cilj kojem stremimo. Administracija mora biti servis korisniku, a ne otuđeni centar moći kojem građani nemaju stvarnog pristupa (ne samo „šalterskog“, birokratiziranog). Držimo da je reforma javne administracije preduvjet i prvi korak za sve druge održive reforme u lokalnoj upravi i zajednici.

Koalicija „Naša travnička priča“ je opredijeljena za stvaranje profesionalne administracije, učinkovite a „jeftine“ u odnosu na ukupne budžetske rashode. Zbog zakonskih okvira i realnih procjena tržišta rada, ne zagovaramo radikalne rezove u kontekstu racionalizacije administracije (poput zamjena postojeće „nekom novom“), već prirodni odliv u slučajevima gdje je ona glomazna, zatim kroz nove sistematizacije bazirane na analizi ljudskih resursa, realnim potrebama posla i optimizaciji rada, te racionalizaciji i optimizaciji drugih troškova koje proizvodi administracija (oprema, materijali, službeni prijevoz itd.). Kroz transparentnost procesa i adekvatno provođenje konkursnih procedura, želimo omogućiti zaposlenje visokokvalitetnog, sposobnog i kompetentnog osoblja. Naglašavamo da je kvalitetna javna služba kičma države i da je neophodno kontinuirano je jačati.

Edukacije i savremene obuke i usavršavanja općinske administracije, sa ciljem dostizanja visokog nivoa profesionalnog poslovanja i uvođenje standarda kvaliteta, smatramo nužnim, i to kao kontinuirani proces. Uz to, neizostavno je praćenje rada, analize učinka, ocjenjivanje zaposlenih kao osnov za nagrađivanje i napredovanje, a sve sa ciljem pozitivnih promjena prakse, navika i odnosa prema javnom poslu – da nije riječ o „Bogom danoj privilegiji“, već o odgovornom poslu i servisu građanima koji plaćaju tu vrstu usluge. Kada je riječ o modernizaciji javne administracije, insistirat ćemo na uvođenju savremenih informacijskih i komunikacijskih tehnologija za unapređenje procesa i praćenju pozitivnih trendova (npr. e-uprava, elektronska korespondencija, one stop shop-ovi, call centri 24/365, Sistem 48 itd.) sve sa ciljem, prije svega, bržih i transparentnijih postupaka za građane, investitore i druge zainteresirane strane.

Unaprijedit ćemo rad svih mjesnih zajednica kroz jačanje njihove uloge i položaja u sistemu odlučivanja, te kvalitetnije finansiranje istih prilagođeno potrebama pojedinih mjesnih zajednica, a sve u skladu sa Zakonom o principima lokalne samouprave.

Jačat ćemo kapacitete potrebne za korištenje sredstava iz EU fondova i partnerskog učešća u međunarodnim projektima, te saradnje s dijasporom.

Uvest ćemo obavezne interne rokove rješavanja pojedinih upravnih predmeta kao što je izdavanje rješenja o registraciji obrta i obavljanja dodatne djelatnosti.

Zalagat ćemo će za pokretanje digitalne transformacije javne uprave, što se odnosi na proces uvođenja IKT rješenja (Informatičkih i telekomunikacionih) u područja poslovanja.

Digitalna transformacija danas utječe na sve sfere našeg društva i sve aspekte naših života. Ona nije pitanje izbora već potrebe, mi već prolazimo kroz ovu transformaciju, ali jako sporo.

U procesu digitalne transformacije težnja je da tehnologija korisnicima omogući da traže ono što žele, i to kad god i kako god to žele. Razvoj novih tehnologija, softvera i aplikacija omogućio je da se organizacije povežu s korisnicima. Digitalna transformacija znači i promjenu svih oblika poslovanja i procesa u kojima su zaposlenici organizacije u interakciji s njezinim korisnicima.

Kroz projekt Evropske komisije «eGovernment benchmarking» su elektronskim uslugama definisani različiti nivoi informatizacije koje se mjere na skali od 1 do 5:

1. Informacija: Na internetu je dostupna samo informacija o usluzi (npr. opis postupka)
2. Jednosmjerna interakcija: Dostupnost formulara u elektronskom obliku za pohranjivanje na računaru. Prazne formulare moguće je isprintati
3. Dvosmjerna komunikacija: Interaktivno ispunjavanje formulara i prijava uz autentikaciju. Ispunjavanjem formulara pokreće se pojedina usluga
4. Transakcija: Cijela usluga je dostupna na internetu, pri čemu je omogućeno popunjavanje formulara, autentikacija, plaćanje i isporuka potvrda, narudžbe ili drugi oblici potpune usluge putem interneta
5. Targetizacija: Javna usluga pruža proaktivnu ili automatiziranu uslugu bez potrebe da korisnici podnose ikakav zahtjev jer se potrebni podaci za realizaciju ovakve usluge prikupljaju po službenoj dužnosti.

Naša javna uprava je na prvom nivou ili na prelazu između prvog i drugog nivoa. Korona kriza je pokazala koliko važne mogu biti digitalne usluge, posebno za marginalizirane grupe koje su najviše osjetile posljedice. Pored toga, korona kriza je pokazala i koliko smo nespremni za digitalno poslovanje. Globalna iskustva pokazuju da tehnologija može osigurati značajne uštede u javnim budžetima i smanjiti troškove javnih usluga. Smanjenje troškova je u smanjenju i nepotrebne i nekompetentne radne snage. Ovdje se radi o principu interoperabilnosti, ne samo tehnološke nego institucionalne jer ukoliko jedna institucija ili privatni sektor može naprijed a javna uprava ga u tome ne prati, imamo ponovo nepremostivi jaz. Ovaj jaz moram smanjiti što prije, uvođenjem digitalizacije javne uprave.

Najveći je problem što se i dalje odgađaju odluke vezane za uvođenje nove tehnologije. Kada u općini imamo nekomptentne osobe, onda se dalje odgađaju ove odluke.

Dalje, problem je što digitalna transformacija uključuje i pojedince: nije dovoljno samo uvesti digitalnu tehnologiju u poslovanje, važno je i educirati zaposlenike. Nekim organizacijama je dovoljno napraviti internetsku stranicu, otvoriti digitalne kanale komunikacije i zaposliti nekolicinu digitalnih stručnjaka, a druge trebaju uvesti mnogo složenije procese digitalnih tehnologija te zapošljavanje mnogo većeg broja stručnjaka na različitim razinama poslovanja. Svaka je organizacija individualna, stoga je i razvojni put digitalne transformacije svake organizacije različit. A to je i razlog zbog kojega se ovaj pojam vrlo često ne razumije u potpunosti.

Stoga, u pogledu digitalne transformacije, na nivou općine ćemo se zalagati za slijedeće:

- Napraviti strategiju digitalne transformacije javne uprave
- U institucijama javne uprave napraviti organizacione jedinice za IT i zaposliti IT stručnjake koji će raditi na digitalnoj transformaciji
- Nabaviti IKT rješenja (Informatičkih i telekomunikacionih), po pojedinim fazama procesa digitalne transformacije

- Organizovati podršku za unapređenje digitalnih vještina službenika na svim nivoima vlasti za korištenje novih dostupnih alata i uvrštanje novih praksi u njihov rad
- Kroz poticaje zadržati i privući IT stručnjake, koji su neophodni za uspješne projekte digitalne transformacije. Na svaki način olakšati proces registracije i poslovanja IT kompanija na području općine

1.4 Razvojni projekti temeljeni na stručnim analizama, strategijama razvoja i studijama izvodivosti

Osnovni ciljevi:

- Strateški korporativni pristup javnom investiranju
- Dosljedna implementacija projekata iz izbornih programa
- Baziranje programa rada na analizama, razvojnim strategijama i preporukama struke
- Omogućavanje praćenja dinamike rada načelnika i administracije

Svjesni težine trenutka i specifične situacije, koju je izazvala pandemija koronavirusa, posebno u ekonomskom smislu, što će imati dugoročni negativni efekat na javne prihode za zemlje krhke ekonomije poput BiH, držimo da je neophodno da se javna potrošnja na svim nivoima, a posebno lokalnom, vrši sa najvećim stepenom pažnje. Neće biti dovoljno javnoj potrošnji pristupiti samo racionalno, već i investitorski i korporativno, kako bi se i manji iznosi sredstava koji će biti na raspolaganju za razvoj usmjeravali u projekte koji mogu donijeti novu vrijednost. Veliki infrastrukturni zahvati koji nemaju primarno pozitivne ekonomske efekte, kao i projekti uređenja, slijede tek nakon stabiliziranja situacije. Stoga su i ponuđeni projekti kandidata koalicije „Naša travnička priča“, koji su predmet zasebnih programa, temeljeni na novim prioritetima zajednice, a to je prvenstveno ekonomski oporavak.

Projekte ćemo integrirati u strategije i programe rada općine, za mandatni period. Želimo minimizirati mogućnost da birači glasaju za projekte naših kandidata, a da se u praksi provode sasvim drugi projekti. Želimo održati datu riječ kako svojim biračima, tako i svim građanima. Načelnik će svoj program i planove rada bazirati na strategijama, studijama, analizama, nalazima i preporukama struke i nadležnih institucija, sa preciziranim aktivnostima, rokovima izvršenja i odgovornim tijelima/osobama. U skladu sa tim, omogućiti ćemo periodične informacije i decidne izvještaje načelnika o izvršenju planiranih aktivnosti i (od strane vijeća) odobrenih programa, a ne o provođenju privatnih politika koje nisu izraz stvarnih potreba i htijenja građana. Svako odstupanje od usvojenih planova i programa, koalicija „Naša travnička priča“ će smatrati samovoljom i kršenjem riječi date prije svega građanima.

Na ovaj način, također ćemo omogućiti vijećnicima, medijima, nevladinom sektoru i svim zainteresiranim građanima stalno praćenje dinamike rada načelnika i vjerodostojnu sliku aktivnosti općinske uprave.

Zalagat ćemo se za realizaciju projekata agilnim pristupom (Agilni pristup realizaciji projekta je skup okvira i metoda realizacije projekata na načelima iterativne i inkrementalne realizacije) tako da korisnici što prije dobiju prve rezultate projekata. Agilne metode forsiraju prilagodljivo

planiranje, bržu isporuku proizvoda i usluga, kontinuirani razvoj i komunikaciju, te poticanje brze i fleksibilne reakcije na promjenu.

1.5 Imenovanja stručnih i etičnih lica na funkcije i u upravljačke strukture

Osnovni ciljevi:

- Imenovanje stručnih i etičnih lica, bez obzira na stranačku pripadnost
- Sprečavanje zapošljavanja bliskih srodnika i stranačkih kolega bez dokaza da je izbjegnut sukob interesa i trgovina utjecajem

Koalicija „Naša travnička priča“ će na općinskom nivou insistirati na praksi imenovanja stručnih i etičnih osoba u upravljačke strukture lokalnih institucija, ustanova i preduzeća.

Izabranim funkcionerima koalicije „Naša travnička priča“ na općinskom nivou bit će zabranjeno zapošljavanje bliskih srodnika, prijatelja, stranačkih kolega i sl., u svim jedinicama lokalne samouprave u kojoj su izabrani, kao i u javnim preduzećima i ustanovama čiji su osnivači jedinice lokalne samouprave – bez jasnih i transparentnih dokaza da je apsolutno izbjegnut svaki mogući sukob interesa i trgovina utjecajem. Pooštravanje ovih uvjeta je neminovno, jer su ovakve pojave uzrokovale urušavanje povjerenja građana u vlast i državu.

1.6 Institucionalna briga o mladima i podrška razvoju

Osnovni ciljevi:

- Dosljedna primjena zakonskih obaveza općine prema mladima (iz Zakona o mladima FBiH)
- Uvođenje pozitivnih domaćih i međunarodnih praksi u procesu institucionalne brige o mladima

Sva domaća i međunarodna istraživanja o populaciji mladih u BiH pokazuju da bi dvije trećine mladih napustilo svoju zemlju zauvijek ili na duži vremenski period, a da je svaki peti već preuzeo određene korake za odlazak iz zemlje. Stanovništvo BiH rapidno stari, čime se smanjuje njegova produktivnost u svakom smislu i izazivaju brojni negativni efekti: opterećenje ionako nestabilnih penzionih i zdravstvenih fondova, nedostatak radne snage i opstrukcija razvoja privrede, direktni gubici uloženih finansijskih sredstava i dr. Ovi su podaci alarm za uzbunu, da je neophodno preuzeti sve institucionalne korake za adekvatnu skrb o populaciji mladih i mjere za njihov razvoj.

Koalicija „Naša travnička priča“ će raditi na donošenju konkretnih mjera za podršku mladima, koje podrazumijevaju:

- povećanje naknada za nezaposlene porodilje;
- subvencioniranje školarine/upisnine studentima, uz obaveznu praksu tokom školovanja i priliku za posao nakon školovanja, koje osigurava industrija – za nove kadrove koji daju izvoznu vrijednost;

- osnivanje stipendijskog fonda za srednjoškolce, uz uvezivanje stipendija sa sistemom obavljanja prakse po principu „dualnog obrazovanja“, te diferencijacija stipendija na: nagradne za najbolje učenike, stipendije za deficitarna zanimanja, socijalne stipendije, sportske stipendije, te osnivanje registra stipendista;
- sigurnosne mjere za polaznike srednjih škola: video-nadzora, fizičko prisustvo policije, anonimni kanali komunikacije za prijave vršnjačkog i drugog nasilja i dr.;
- program razvoja amaterskog sporta u srednjim školama – besplatne sportske sekcije, te podršku mladim profesionalnim sportašima, posebno reprezentativcima;
- finansiranje kulturnih projekata kreiranih i namijenjenih isključivo za mlade;
- „Proaktivna transparentnost mjera za mlade“ – posebna promocija svih mjera za mlade: javnih poziva za stipendije, zapošljavanje, start-upe itd. i obuhvatanja što šire populacije mlađih;
- povećanje sredstava fonda za stambeno zbrinjavanje mlađih, uz uvrštavanje i sufinansiranje najma stanovanja za mlade bračne parove;
- omasovljavanje sistematskih pregleda za srednjoškolce i studente – učiniti ih periodičnim, obaveznim i besplatnim;
- izgradnja parka/poligona za mlađe, u prirodnom ambijentu (npr. šumski adrenalin-parkovi i sl.);
- povećanje sredstava za projekte za mlađe koje implementiraju omladinske organizacije;
- imenovanje predstavnika mlađih (iz vijeća mlađih) u skupštinsko radno tijelo (komisiju za mlađe);
- uspostava radnog mjesta - Pomoćnik načelnika za mlađe koji će se baviti pitanjima i unapređenjem života mlađih
- osnivanje centra za razvoj preduzetništva mlađih, ujedno i centra za prekvalifikacije/dokvalifikacije, te poslovnog inkubatora mlađih, uz fond za poticaje;
- jačanje institucionalnih kapaciteta za brigu o mlađima (ministarstvo/služba/ sektor/odjeljenje);
- podstaći privatni sektor za zapošljavanje mlađih kroz uvezivanje javnog i privatnog sektora i davanja subvencija poslodavcima uz uslov da se provodi kontrola radi spriječavanja nepotizma
- formiranje centra za mlađe.

Institucionalna briga o mlađima u Federaciji BiH propisana je Zakonom o mlađima FBiH, i obavezuje sve nivoe vlasti na njegovu implementaciju. Navedeni set mjera temeljen je umnogome na odredbama tog zakona. Izabrani zvaničnici koalicije „Naša travnička priča“, u skladu s izbornim kapacitetom, zagovarat će, kreirati i dosljedno provoditi politike prema mlađima, zasnovane kako na predmetnom zakonu, tako i na najboljim domaćim i međunarodnim praksama.

Poseban problem u društvu predstavlja loš uticaj sportskih kladionica na ponašanje i kulturu življenja mlađih, koji sve više svoj slobodnog vremena ali i novaca ulažu u klađenje. Podatak da najviše srednjoškolaca vrijeme provodi u kladionici ukazuje i na problem blizine kladionica školama, kao i na nedostatak programa i prostora gdje bi mlađi mogli kvalitetno provoditi slobodno vrijeme. Koalicija „Naša travnička priča“ će se zalagati da se kladionice udalje od svih obrazovnih institucija i drugih objekata koje koriste mlađi (školska igrališta i sl.). Radit ćemo na formiranju terapijskih grupa, na čelu sa stručnom osobljem koje bi mlađim ovisnicima o klađenju pomogli u prevladavanju svojih slabosti, te im ponudili korisne savjete za prevazilaženje krize u kojoj su se našli.

U Općini Travnik, u proteklom periodu, primjetan je problem povećanja korištenja narkotika, posebno kod mlađe populacije, čak i u ruralnim dijelovima općine. Koalicija „Naša travnička priča“ će inicirati i podražavati aktivnosti u suzbijanju ove pošasti i to:

- radom na provedbi mjera na nivou Općine
- povećanjem dostupnosti preventivnih intervencija djeci i mladima i unaprijeđenjem kvalitete i održivosti preventivnih programa za djecu i mlade
- povećati dostupnost i unaprijediti programe prevencije u okviru nadležnosti Centra za socijalni rad za rizične skupine djece i mlađih. Unaprijediti mjere liječenja, tretmana i resocijalizacije ovisnika. Razvijati multidisciplinarni rad u području tretmana i skrbi o ovisnicima, specifične oblike tretmana za posebne skupine ovisnika (maloljetnici, dvojne dijagnoze i sl.). Razvijati zdravstvene programe i programe socijalne zaštite za postupanje s počiniteljima kaznenih djela.
- U budžetu planirati finansijska sredstva za pomoć u finansiranju organizacija civilnog društva za programe za edukaciju mlađih u cilju suzbijanja korištenja narkotika
- Poticati, provoditi i finansijski podržati znanstvena istraživanja problematike ovisnosti.

1.7 Briga o djeci i porodici

Osnovni ciljevi:

- vođenje pronatalitetne politike
- institucionalna podrška roditeljima s velikim brojem djece
- razvoj i širenje mreže ustanova predškolskog odgoja i obrazovanja
- podrška projektima za unapređenje sigurnosti djece
- skrb o djeci s poteškoćama u razvoju
- sistemska podrška djeci koja postižu izvanredne rezultate

Porodica je osnovna ćelija i temelj svakog društva, a djeca garant njegovog opstanka. Stoga brigu o djeci i porodici koalicija „Naša travnilka priča“ smatra ne samo značajnim socijalnim pitanjem, već i visokim političkim prioritetom. U vrijeme teškog položaja radnika, u kontekstu čestog prekovremenog rada i neizvjesnog trajanja radnog vremena, te neprimjereno niskih plata, roditelji ne mogu osigurati adekvatnu skrb o djeci, posebno o najmlađim naraštajima koji iziskuju cjelodnevnu brigu i pažnju. Iz istog razloga, mlađi bračni parovi rijetko se odlučuju za veći broj djece, što pokazuje kontinuirani negativni trend prirodnog priraštaja u našoj zemlji.

Mlade majke - porodilje, posebno one nezaposlene, nisu adekvatno nagrađene za svoj doprinos društvu od strane institucija vlasti. Koalicija „Naša travnička priča“ želi da kroz dostatnu finansijsku podršku mlađim parovima za novorođenu djecu stimulira natalitet i omogući adekvatan tretman i dostojanstven položaj mlađim roditeljima, posebno majkama. Posebne finansijske stimulacije osigurat ćemo porodicama s velikim brojem djece.

Tražit ćemo da općina osigura poseban fond sa JU Centrom za socijalni rad za finansiranje mjesecnih novčanih naknada u trajanju do godinu dana nezaposlenim majkama porodiljama, kako bi se ukinula neravnopravnost ovih porodilja u odnosu na majke-porodilje koje su zaposlene i imaju Zakonom o socijalnoj zaštiti to pravo zagarantirano.

Lokalna samouprava ima mogućnosti i nadležnosti pomoći i u izgradnji i proširenju mreže ustanova predškolskog odgoja i obrazovanja – i javnih i privatnih, te ih kroz različite vrste podrške i subvencija učiniti široko dostupnim, posebno za najugroženije kategorije porodica. Također, „produženi boravak“ u osnovnim školama nedovoljno je zastupljen i razvijen, a prijeko je potreban u svim osnovnim školama i moguće ga je riješiti kroz podršku lokalnih uprava i saradnju s osnovnim školama. Kada je riječ o sigurnosti djece, prioritet naših predstavnika bit će besplatan i pravovremen prijevoz za sve učenike kojima je on potreban.

Kada je upitanju lokalni nivo cilj nam jeste otvaranje predškolskih ustanova na području Kalibunara, Turbeta i Biljanske regije jer djeca moraju imati jednake uslove i mogućnosti predškolskog odgoja i obrazovanja.

Posebnu pažnju posvetit ćemo djeci s poteškoćama u razvoju, i gdje god je moguće podržati osiguravanje uvjeta za uključivanje u inkluzivni proces nastave, sa ciljem podrške razvoju djece, ali i neophodnog olakšavanja njihovim roditeljima. Finansijski ćemo podržavati projekte inkluzije matičnih i strukovnih udruženja.

Djeca sa poteškoćama u razvoju zaslužuju svoje mjesto i u politici zapošljavanja u skladu sa svojim stepenom obučenosti i sposobljenosti, te ćemo se zalagati da ova djeca dobiju priliku koristiti sebi i svojim porodicama, ali i društvu u kojem žive.

Kada je riječ o vannastavnim aktivnostima, u budžetima ćemo osigurati novac za finansiranje ili sufinansiranje odlazaka učenika u pozorišta, pohađanje škola plivanja i skijanja, izlete u prirodi, posjete kulturnim i historijskim znamenostima i sl. Uspostavit ćemo stalni sistem nagrađivanja djece koja postižu izvanredne rezultate u oblastima kulture, sporta, nauke i umjetnosti, uz osiguravanje stalne stavke u budžetu za ovu namjeru i njeno kontinuirano povećanje.

1.8 Zdravstvena i socijalna skrb, briga o ugroženim i zaslužnim kategorijama

Osnovni ciljevi:

- socijalna osjetljivost i pomoć najugroženijim
- briga o lokalnim zdravstvenim ustanovama i uslovima boravka pacijenata u njima
- unapređenje uvjeta za zdravo starenje
- socijalna pomoć bez diskriminacije (manjine, romska populacija i dr.)
- pomoć osobama s invaliditetom
- besplatna pravna pomoć

Lokalni nivo vlasti zbog ograničenih resursa i nadležnosti ne može riješiti pitanje kvaliteta zdravstvene zaštite, ali može uveliko doprinijeti njegovom poboljšanju na svom području. Opredijeljeni smo za izdvajanje značajnih budžetskih sredstva za opremanje prostora porodične medicine, za poboljšanje njihove funkcionalnosti i urednosti, sa ciljem unapređenja uvjeta boravka pacijenata u lokalnim zdravstvenim ustanovama, posebno djece, starih i iznemoglih, lica s invaliditetom i dr. Građanima koji su nepokretni ili teško pokretni, držimo

neophodnim osigurati mobilne ekipe pomoći, koje će im biti na raspolaganju kao asistencija za prijevoz do ljekara, nabavku lijekova i medicinskih potrepština.

U budžetima ćemo za penzionere sa najnižim penzijama planirati i sredstva za subvenciju troškova nabavke neophodnih lijekova koji nisu pokriveni redovnim zdravstvenim osiguranjem.

Podržavat ćemo projekte zdravog starenja: radit ćemo na unapređivanju i poboljšavanju uslova boravka u centrima iz ove djelatnosti. Finansirat ćemo aktivnosti koje podrazumijevaju boravak penzionera u prirodi, u rehabilitacionim centrima, u mjestima prilagođenog rekreativnog sadržaja toj populaciji. Za praznike (bajrami, božići, nova godina), penzionerima sa najnižim penzijama osigurat ćemo kratkoročne finansijske pomoći u visini i prigodnim iznosima koje dozvole mogućnosti (budžet).

Pored navedene brige o starima, penzionerima, bolesnima, invalidima i dr., te u prethodnim poglavljima obrazložene brige o porodici i djeci, u našem fokusu bit će sve socijalno ugrožene kategorije u materijalnoj poteškoći i potrebi, bez ikakve diskriminacije, posebno nezbrinuta romska populacija, povratničke kategorije bez obzira na nacionalnu i vjersku pripadnost, kao i projekti institucionalne podrške i pomoći migrantima.

Zalagat ćemo se za otvaranje dnevnog centra za rad sa djecom ulice/djecom koja prosjače. Sveprisutno siromaštvo u društvu za posljedicu ima i pojavu prosjačenja kod djece, odnosno trgovine djecom, kao jedan od oblika kršenja prava djeteta. Integriranje modela Dnevnog centra za djecu ulice, djeci i porodicama će se omogućiti podrška i pomoći po pitanju ostvarivanja prava djece na identitet, obrazovanje, socijalnu i zdravstvenu zaštitu, kvalitetno provođenje slobodnog vremena, kao i integraciju u zajednicu.

Tražit ćemo da se u budžetu osiguraju sredstva za rad punim kapacitetom prihvatne stanice Centra za socijalni rad u Travniku koja je jedina takve vrste u našem kantonu i može da odgovori svim zahtjevima privremenog zbrinjavanja žrtava nasilja u porodici kao i napuštene djece ili djece sa devijantnim ponašanjem do konačnog i trajnog zbrinjavanja.

Osnovat ćemo u okviru Centra službu koja će pružati kućnu njegu i pomoći našim starim i iznemoglim osobama kojih je iz dana u dan sve više zbog trenda iseljavanja mladih osoba i napuštanja svojih matičnih porodica i domova. Ova lica su na žalost prepuštena sama sebi jer većina njih ne može sebi osigurati smještaj u staračkim domovima.

Na nivou općine organizirati ćemo besplatnu pravnu pomoć gdje bi se, nakon uvida u raspoloživu dokumentaciju, građanima davali savjeti i preporuke i informacije ko je nadležan i kome da se obrate za konkretnu pravnu situaciju. Ujedno bi građanima bili detaljno objašnjeni zakonski propisi koji regulišu pojedine oblasti. Općina će obezbjediti sredstva za angažovanje pripravnika/volontera pravnika u skladu sa Zakonom o radu. Mjesto: Info centar Općine Travnik.

1.9 Porodice šehida i poginulih boraca, demobilisani borci

Osnovni ciljevi:

- sistemska briga o boračkoj populaciji i njihovim porodicama
- podrška zbrinjavanju djece šehida i piginulih boraca
- podrška projektima boračkih udruženja, uz kontinuirano praćenje realizacije projekata

Kao politička organizacija koja u svojim prvim redovima ima dokazane patriote, nosioce najviših ratnih priznanja, stečenih u borbama i zaluženih krvlju i zdravljem, koalicija „Naša travnička priča“ se sa posebnim poštovanjem odnosi prema boračkim kategorijama i njihovim porodicama. Šehidske i porodice piginulih boraca, kao i demobilisani borci, imat će stalno otvorena vrata kod predstavnika u lokalnoj upravi. Posebna pažnja u kontekstu socijalne brigade bit će usmjerena prema roditeljima šehida i piginulih boraca, a djeca šehida i piginulih boraca koja su u potrebi bit će obuhvaćena programima zapošljavanja, stipendiranja, edukacija i drugih vidova podrške. Službama za zapošljavanje na raspolaganje ćemo staviti svaki vid podrške lokalne uprave kako bismo zajednički uspjeli pružiti šansu za rad i zaposlenje djeci šehida i piginulih boraca. Stambeno nezbrinute porodice imat će podršku i poticaj lokalne uprave u rješavanju svog stambenog pitanja kod viših nivoa vlasti.

Demobilisani borci, posebno oni u penziji ili bez radnog angažmana, a kojima zdravlje i vrijeme daju mogućnost bavljenja poljoprivrednom proizvodnjom, imat će podršku u nabavci potrebne opreme, sjemena, startnih sredstava, dostupnosti zemljišta i vode. Također, finansirat ćemo i projekte dokvalifikacije i prekvalifikacije i osposobljavanje nezaposlenih demobilisanih boraca za radna mjesta koja traže dodatna znanja i vještine.

Na opštinskom nivou ćemo se zalagati se za bolju realizaciju prava branitelja koja su im zagarantovana Zakonom o dopunskim pravima branitelja na kantonalm nivou (Članak 9 navedenog Zakona) a koja, između ostalog, opisuju prava na zdravstvenu zaštitu i banjsko liječenje, prednost pri zapošljavanju, stipendiranju, upisu u obrazovne ustanove, zakupu ili otkupu prostora, novčane naknade za razne osnove i oslobađanja od obaveza plaćanja za niz naknada. Posebno, zalagat ćemo se da demobilisani borci, porodice šehida i piginulih boraca budu oslobođeni svih administrativnih taksi u Općini Travnik, kao i propisanih renti za izdavanje dozvola kroz ostvarivanje svojih imovinskih i drugih prava.

1.10 Podrška privredi

Osnovni ciljevi:

- podrška u sanaciji štete uzrokovane pandemijom
- olakšavanje procedura osnivanja obrta i izdavanja potrebnih dozvola investitorima
- proaktivni pristup u privlačenju investicija
- strateško planiranje kao osnov ulaganja u industrijske zone (izgradnja 4 industrijske zone)
- podrška savremenim, inovativnim i kreativnim oblicima privredne djelatnosti
- podrška izvozno orijentiranoj privredi

Nakon pandemije koronavirusa i svih posljedica, posebno ekonomskih koje je izazvala, a čije ćemo negativne efekte svjedočiti zasigurno duži vremenski period, koalicija „Naša travnička priča“ je u potpunosti svjesna da će privreda iziskivati posebnu pažnju i nove pristupe podrške. S obzirom na to da viši nivoi vlasti nisu ni izbliza dovoljno učinili da kreiraju adekvatne mjere

koje bi ublažile posljedice pandemije po privredne subjekte, svjesni smo da će veliki dio tereta u tom kontekstu snositi općine.

Fokus koalicije „Naša travnička priča“ će biti na očuvanju radnih mesta i stabiliziranju postojećih privrednih subjekata. Lokalna uprava ne može utjecati na poresku politiku prema privredi, ali ima više mogućnosti direktne podrške i olakšica privrednim subjektima, u kontekstu kratkoročnih mjera (npr. ukidanje komunalnih taksi ili sl.). Između ostalih, poslovni prostori, zemljišta i druga imovina općine koji su dati pod zakup privatnim firmama mogu se učiniti potpuno besplatnim za korištenje određeni vremenski period, ili im se znatno umanjiti cijene zakupa. Jedan od prvih koraka mora biti i izmirenje svih dugovanja općine prema privrednim subjektima, za sve prispjele obaveze, po cijenu zaduživanja ukoliko na raspolaganju ne stoje doстатna sredstva.

Kada je riječ o administrativnim olakšicama za poslovanje ili pokretanje novog posla, neminovno je pojednostavljenje procedura i drastično skraćenje rokova za pribavljanje potrebne dokumentacije, kao i „jednošalterski“ pristup i omogućavanje rješavanja potrebe na jednom mjestu – uspostava tzv. one stop shop bit će jedna od ključnih mjera za ubrzavanje i transparentnost procedura u Općini Travnik. U vremenu nakon pandemije, kada bude nedostajalo javnih radova, ali i privatnih investicija, neophodno je proaktivno pristupiti pitanju investiranja i približavanja investitora općini i u punom kapacitetu staviti im se na raspolaganje, sa svim potrebnim servisnim uslugama i olakšicama u korištenju lokalnih resursa. U svrhu direktne promocije općinskih resursa u kontekstu investiranja, organizirat ćemo dane otvorenih vrata, sajmove i konferencije za sve potencijalne investitore, domaće i strane, te ćemo sa lokalnom administracijom učestvovati na značajnim međunarodnim sajmovima i manifestacijama.

U cilju podrške razvoju preduzetništva i osnivanju novih privrednih subjekata, razvijat ćemo nove servisne usluge u lokalnoj administraciji za pružanje savjeta u procesu osnivanja biznisa, uz subvenciju svih početnih administrativnih troškova za osnivanje obrta, a sve kroz konkurse za izbor najbolje poslovne ideje koji će se raspisivati svake godine kao i drugim općinama širom BiH.

Izabrani predstavnici koalicije radit će na izgradnji infrastrukturnih i prostornih prepostavki za razvoj biznisa, kroz strateško prostorno planiranje privrednih/industrijskih zona (izgraditi 4 industrijske zone u naredne 4 godine), uz osiguravanje neophodne komunalne infrastrukture i drugih uvjeta za izgradnju privrednih objekata. Kod viših nivoa vlasti insistirat ćemo da se projekti koji su u njihovoj nadležnosti, a provode se na teritoriji i u saradnji s općinom – npr. izgradnja šumskih puteva, uređenje vodnih korita, izgradnja industrijskih zona i dr. – efikasno planiraju i implementiraju, u skladu sa preciziranim rokovima.

Kada je riječ o tržištu rada, koalicija „Naša travnička priča“ će insistirati na analizi stanja i podacima o najtraženijim zanimanjima u općini, kao polaznoj osnovi za sve mjere i aktivnosti koje će preduzimati u oblasti politike zapošljavanja. Uz podršku postojećim granama privrede, stimulirat ćemo razvoj novih savremenih djelatnosti, kreativne industrije i inovacija, koji u kontekstu masovne zastupljenosti savremenih tehnologija pružaju nove mogućnosti i poligon mladim ljudima za edukaciju i zapošljavanje. U tom duhu, posebno ćemo podržati mlade pri

pokretanju „start up biznisa“ u oblasti ICT-a, dizajna, muzike, filma, mode, marketinga, izdavaštva, medija i umjetnosti koji prati moderne i savremene trendove.

Radit ćemo na kontrolisanom jačanju koncepta javno-privatnog partnerstva, kroz transparentan proces udruživanja uz obostranu korist, i privatne i općinske strane partnerstva.

Posebnu brigu posvetit ćemo oporavku sektora turizma, koji je najdirektnije pogodjen stanjem nesreće, te strateški investirati u razvoj i promociju turističke ponude.

Općina mora podržati razvoj vjerskog turizma, koji na području Općine Travnik ima posebnu perspektivu za razvoj.

Izvozno orijentisane grane privrede, posebno prerađivačke s finalnim proizvodima (industrija namještaja, namjenska industrija, softverska industrija, prehrambena industrija), bit će prioritet lokalne administracije koju budu predvodili naši izabrani zvaničnici.

Ono što se može istaći kao potencijal Općine Travnik svakako je razvoj poljoprivrede i ruralnog turizma, zbog izuzetnih prirodnih potencijala. Općina nažalost ne provodi projekte u oblasti razvoja poljoprivrede, zbog toga je potrebno intenzivirati napore u oblasti povećanja prinosa i grla, ukrupnjavanju posjeda, jačanju zadruživanja i poboljšanju poljoprivredne infrastrukture. Jačanje poljoprivrede će direktno doprinijeti poboljšanju uslova za ostanak stanovništva na selu, što je itekako važno za održivi razvoj općine. Takođe, općina se mora opredjeliti ka razvijanju ruralnog turizma, uvezivanjem seoskih smještajnih kapaciteta i prirodnih bogatstava u jedinstven turistički proizvod.

Kada je riječ o platformi za razvoj poljoprivrede Općine Travnik, općinska uprava će dati doprinos i učešće u programima poticaja viših nivoa vlasti, stavljajući pod najpovoljnijim uslovima na raspolaganje poljoprivrednicima svoje prirodne resurse – prvenstveno zemljište i vode – uz subvencioniranje nabavke savremene mehanizacije i sjemena.

Koalicija je izradila sektorske planove i operativni dio platforme - sektorski planovi, operativni ciljevi, programi, projekti i mjere, usmjereni ka poboljšanju kvaliteta života u Općini. Operativni planovi su izrađeni za naredne četiri godine i obuhvataju listu prioritetnih programa i projekata/mjera, čime se stvara osnova za realizaciju sektorskih i strateških ciljeva. Nadalje, prioritetni programi i projekti nisu samo osnova za korištenje općinskih i drugih domaćih izvora sredstava, nego i dobra osnova za pristup eksternim izvorima sredstava.

Poljoprivredna proizvodnja je trenutno na niskom stepenu razvoja (stihjsko stočarstvo i dio poljoprivredne proizvodnje uglavnom za vlastite potrebe). Općina Travnik je jedina u državi BiH a i šire, koja na svom teritoriju ima velike prerađivačke kapacitete za preradu mesa i mlijeka, koji su izvozno usmjereni a kojima nedostaje sirovine (mlijeka i mesa) pa su primorani kupovati iz susjednih općina i uvoziti. Imajući u vidu postojanje izvozno usmjerenih prerađivačkih kapaciteta u našoj općini te ogromnih potencijala za razvoj poljoprivrede posebno stočarstva tj. proizvodnje mesa i mlijeka sasvim je logično da se dio budžeta naše općine usmjeri prema ekonomskom razvoju sela koja će u budućnosti biti nosilac ekonomskog razvoja općine kao što je slučaj u svim razvijenim općinama u EU. Samo ekonomski jako i održivo selo garant je ekonomske stabilnosti grada, povećanja standarda i smanjenja migracija iz sela u grad i iz manjih gradova u veće gradove što su trendovi danas.

Zalagat ćemo se za ekonomsko jačanje sela kroz budžetsku podršku razvoju poljoprivrede. Razlozi su slijedeći

- Na selu kroz razvoj poljoprivrede stvaraju se nove vrijednosti tj. koriste se prirodni resursi i uložen rad domaćina da se dobije sirovina (mljekko, meso i dr.) čiji plasman je osiguran kroz otkup.
- Obzirom da je trenutno nedovoljna proizvodnja mlijeka i mesa za prerađivačke kapacitete koji se nalaze na Općini Travnik i koji sirovinu nabavljaju u susjednim općinama što im povećava troškove, sasvim je logično da postoji ogroman potencijal za povećanje proizvodnje sirovina za što postoje neiskorišteni prirodni resursi na selu.
- Sve sirovine (mljekko, meso i dr.) koje se proizvedu na općini Travnik ukoliko se i prerade u prerađivačkim kapacitetima na našoj općini donose višestruku finansijsku korist našoj općini kroz povećanje standarda građana i budžeta općine.
- Prije rata na našoj općini nije bilo prerađivačkih kapaciteta a poljoprivreda je bila puno razvijenija a selo ekonomski snažnije. Ovčarstvo je trenutno u najtežem položaju i doživljava ogroman pad uglavnom zbog nebrige viših nivoa vlasti (kanton i federacija) a znamo da je Travnički sir i autohton pasmina ovce Pramenka – Dubski soj jedan od prepoznatljivih brendova naše općine. Obzirom da viši nivoi vlasti ne pomažu razvoju ovčarstva mi kao općina moramo preuzeti odgovornost i pomoći ovu granu poljoprivrede snažnom podrškom kroz finansijski poticaj mladim farmerima kako se ne bi ugasila ova stoljetna tradicija.

U skladu sa gore pomenutim činjenicama prioritet dajemo intenziviranju stočarske proizvodnje (proizvodnja mesa i mlijeka) jer su to grane koje su rentabilno tržišno orijentisane i koje će dovesti do otvaranja novih radnih mjesta u oblasti agrara.

U operativnom dijelu platforme za razvoj poljoprivrede, detaljno je urađena analiza i dat je prijedlog iznosa budžeta općine za ove namjene i njegova raspodjela za poticaje za poljoprivrednike po različitim oblastima, (proizvođači mlijeka, uzbunjivači stoke, organizatori otkupa mlijeka, za ruralni turizam, zaštitu okoline, itd.). Razrađeni su i strateški fokusi i efekti koji se očekuju provođenjem ove platforme.

Zastupljenost više klimatskih zona, velike površine prirodnih livada i pašnjaka i prostrano područje sa bogatim florističkim sastavom osiguravaju povoljne uvjete za razvoj ove privredne djelatnosti u odnosu na mnoga područja u BiH.

Razvojni cilj platforme je pomoći poljoprivrednicima uz nastojanje da pređu iz oblika proizvodnje za vlastite potrebe (potrošnju) na komercijalno bavljenje poljoprivredom, te da im se pomogne u razvijanju sektora farmskih poduzeća i stvaranje prilika za zapošljavanje na selu.

Općina Travnik je izuzetno bogata prirodnim resursima, rudama, šumama, visokim hidropotencijalom, kao i brojem sunčanih dana koje treba kontrolisano iskorištavati. Koalicija „Naša travnička priča“ je stava da je potrebno da se iskoristi što više od dostupnih bogatstava, obezbjeđujući osnovu za dalju eksploataciju ruda, regulišući u domenu opštine eksploataciju šume i sektor drvoprerade, definisanju uslova za eksploataciju obnovljivih izvora energije, prije svega bogatstvo vodotoka i podsticanje proizvodnje vjetro energije.

I pored donekle razvijenog zimskog turizma pretpostavke za oživljavanje seoskog turizma su sve realnije, pa i u područjima u kojima prije rata taj vid turizma nije bio razvijen, a velike su mogućnosti i za razvoj vjerskog turizma, koje svakako treba istražiti. Postepeno se stvaraju i uslovi za valorizovanje turističke djelatnosti u Travnik i okolini putem markiranja, kategorizacije, konzervacije i revitalizacije kulturno-historijskih spomenika kojima obiluje Općina Travnik i razvoj turizma je svakako jedan od jačih potencijala za razvoj ovog kraja.

1.11 Održivi razvoj, komunalna pitanja, urbanističko uređenje, zaštita okoliša i upravljanje prostorom

Osnovni ciljevi:

- transparentnost procedura pri izradi plansko-provedbene dokumentacije
- unapređenje energetske efikasnosti općinskih objekata
- podrška u eliminaciji nelegalnog otklanjanja otpada
- dugoročna rješenja u vodosnabdijevanju i odvodu otpadnih voda
- revizija projekata izgradnje mini hidroelektrana i ograničavanje ovih projekata u budućnosti
- rješavanje pitanja održavanja javnih stambenih jedinica

Lokalne uprave koje bude predvodila koalicija „Naša travnička priča“ fokusirat će se na održavanje i popravku postojeće infrastrukture i objekata i uređivanja svih javnih površina u lokalnoj zajednici. Ulaganje u nove projekte bit će samo u mjeri u kojoj su oni nužni za bitno popravljanje stanja u lokalnoj zajednici i u kontekstu doprinosa stvaranja nove vrijednosti, uz izbjegavanje „populističkih“ projekata u promotivne svrhe – posebno uzimajući u obzir novonastalu situaciju uzrokovanu stanjem nasreće i pad javnih prihoda.

Pristupit ćemo transparentnoj proceduri izrade plansko-provedbene dokumentacije i novih programa uređenja i očuvanja javnih površina, kao i programe uređivanja građevinskog zemljišta. Odsustvo vizije većine dosadašnjih lokalnih vlasti po pitanju izgleda prostora lokalne zajednice i pogodovanje investitorima-tajkunima za ostvarivanje brzog profita, bez strateškog plana razvoja, neće više biti praksa. Prevelika spratnost i gabariti objekata, male ili nikakve parkovske površine, te nedovoljan broj parking mesta i neophodne popratne infrastrukture (prvenstveno škola i vrtića, prostora za kulturu, sport i rekreaciju, kao i njihovog položaja) urušava standard života u lokalnoj zajednici do stepena nepodnošljivosti i znatno doprinosi zagađenju i urušavanju kvaliteta zraka, naročito u zimskim mjesecima. Prostorom će se uz nadležnu administraciju baviti prvenstveno struka, na interdisciplinaran način, uvažavajući sve potrebe građana. Insistirat ćemo na planiranju i uređenju parkovskih površina i zasadima drveća, kao i na postavljanju parkovskog mobilijara, uz sigurna igrališta za djecu, 24-satni video nadzora igrališta, mreže biciklističkih staza i dr. Pored resursa lokalne samouprave, maksimalno ćemo, kao ozbiljni partneri, koristiti dostupnu podršku viših vlasti i međunarodnih projekata. Pored efikasnog upravljanja prostorom, odgovorna općinska administracija ima priliku iskoristiti značajnu imovinu koju ima u svom posjedu, kroz definisanje i uspostavu sistema upravljanja imovinom.

Travnik je se suočava s visokim ambijentalnim koncentracijama po zdravlje štetnih sitnih čestica koje zagađuju zrak, pogotovo u zimskom periodu. Razlog tome je nedostatak politika smanjenja zagađenja zraka i veća upotreba čvrstih goriva za grijanje i kuhanje. U Općini Travnik ima jako mnogo domaćinstava koje koriste peći na drva i ugalj. Izloženost zagađenom zraku može imati ozbiljne posljedice po zdravlje. Koalicija će se zalagati za pokretanje procesa razvoja infrastrukture i sistema za monitoring kvaliteta zraka i definisanje procedura djelovanja u skladu sa rezultatima mjerena. Paralelno s tim, zalagat će se za otklanjanje svih pravnih prepreka za pokretanje gasifikacije Opštine Travnik.

Finansijski ćemo potpomagati kreiranje energetski efikasnih objekata, kako javnih zgrada tako i privatnih, za domaćinstva koja se odluče da izvrše utopljavanje svojih objekata (fasada, stolarija, ugradnje solarnih panela, gasifikaciju, centralizaciju sistema grijanja i sl.).

Započet ćemo procese trajne eliminacije svih nelegalnih deponija smeća, uključujući i zagađenje voda, uz pooštravanje kaznene politike za sve one koji otpad odlažu na nepropisan način, uz uspostavljanje sistema prijave za nelegalno odlaganje otpada i nagrađivanje građana-prijavitelja. U svakom od naselja na najmanje jednoj lokaciji osigurat ćemo posude za separiranje čvrstog reciklažnog otpada. U dvorištima osnovnih škola želimo osigurati posude za selektiranje reciklažnog otpada, između ostalog i sa ciljem edukacije najmlađih o potrebi ekološkog i funkcionalnog razdvajanja otpada. Redovan odvoz smeća uspostaviti ćemo kao standard i neupitno pravilo. Finansijski ćemo podržavati školske ekološke radne akcije na uređenju javnih površina. U tom kontekstu, podržavat ćemo i projekte ekoloških udruženja o podizanju ekološke svijesti i akcije koje za cilj imaju čišću okolinu (priklapanje plastičnog otpada, korištenje eko-vrećica itd.). Javna higijena, iako je prvenstveno u nadležnosti viših nivoa vlasti, bit će pod budnim nadzorom i u prioritetima (utemeljenim u budžetu).

Trajni prioritet bit će sigurno i stabilno vodosnadbevanje i izgradnja kanalizacione mreže, na svim mjestima gdje je još nema, bez obzira na njihovu udaljenost od općinskih centara, vodeći računa o pravednosti i ravnomjernom ulaganju u sve dijelove lokalne zajednice.

Uredit ćemo baze podataka za lokalne ceste, utvrditi njihovo stanje, uraditi programe njihovog redovnog održavanja i sezonskog saniranja, te potrebu neophodne signalizacije. Izvršit ćemo i analize stanja na taxi-stajalištima i u saradnji sa taksistima napraviti plan podrške njihovoj obnovi, uređenju, nadzoru, modernizaciji i održavanju. Posebnu pažnju posvetiti ćemo parkingprostorima i unapređenju sistema parkiranja, uz modernizaciju i dogradnju potrebne infrastrukture. Sa ciljem sigurnosti u prometu, vršit ćemo postepenu dopunu i rekonstrukciju javne rasvjete, pločnika, staza, stepeništa, posebno na frekventnim mjestima, u blizini škola, janvihi ustanova i dr., uz uređenje trgova i centralnih šetnica, uz nove režime i ograničenja saobraćaja. Kada je riječ o javnom prijevozu, prioritet je osigurati njegovu pravovremenost, stabilnost i funkcionalno informiranje građana, u saradnji lokalne zajednice i odgovornih prevoznika.

1.12 Obrazovanje

Osnovni ciljevi:

- završetak izgradnje srednjoškolskog centra u Travniku

- modernizacija školske infrastrukture
- unapređenje sigurnosti učenika
- podrška institucijama i organizacijama u razvoju ponude neformalnog obrazovanja
- podrška profesionalnom sportu i strateški razvoj amaterskog sporta
- jačanje vezanosti djece i mladih za kulturne ustanove

Oblast obrazovanja već je prethodno tretirana i dijelom obrađena u prethodnim poglavlјima o djeci i porodici, te institucionalnoj brizi o mladima (dijelom i kultura i sport). Oblast obrazovanja nije u primarnoj nadležnosti Općine, ali neizostavna obaveza lokalne zajednice jeste da bude pokretač i inicijator unapređenja boljeg standarda i uvjeta školovanja djece i mladih na svome području. Naglašavamo da u sami vrh naših prioriteta spada oblast obrazovanja. Školska infrastruktura u BiH uglavnom je zastarjela i u potpunosti ne odgovara zahtjevima savremenog obrazovanja. Svjesni smo potrebe izgradnje novih obrazovnih i odgojnih ustanova i sanacije postojećih, njihove rekonstrukcije i modernizacije. Također, opredijeljeni smo za unapređenje sistema za sigurnost djece u školama i na putu do škola, sa svim alatima koji podrazumijevaju savremen pristup i visok nivo zaštite. Važno nam je pitanje osiguravanja fizičkog pristupa školskim i drugim ustanovama djeci i odraslim osobama s invaliditetom. Prethodno smo naglašavali značaj utopljavanja javnih objekata u kontekstu postizanja bolje energetske efikasnosti, ali je njihovo utopljavanje, prvenstveno zbog starosti objekata, često neophodno i sa ciljem poboljšanja ambijenta za boravak učenika i školskog osoblja i stvaranja uvjeta za normalan rad. Posebno značajnim držimo modernizaciju školskih ustanova i drugih ustanova od značaja za obrazovanja (poput biblioteka npr.), i u kontekstu nabavke savremene opreme i uređivanja prostora kako bi mogli odgovoriti potrebama savremenog školstva, ali i u kontekstu dopune sadržaja i programa ospozobljavanja djece za ovlađavanje novim tehnologijama, u šta smo spremni ulagati značajna budžetska sredstva. Uz podršku razvoju formalnog obrazovanja, odlučni smo podržati sve značajne projekte u oblasti neformalnog obrazovanja, koje danas smatramo neophodnim kao neizostavnu dopunu zvaničnom obrazovnom sistemu.

U Općini Travnik, najveći problem u oblasti obrazovanja je zastoj u izgradnji srednjoškolskog centra koji traje već 13 godina. Od odluke Doma za ljudska prava 2003. godine kada je zgrada travničke gimnazije vraćena Vrhbosanskoj nadbiskupiji, Mješovita srednja škola Travnik i Mješovita srednja ekonomsko ugostiteljska škola trenutno svoje obrazovne aktivnosti provode u skućenom i neuslovnom prostoru zgrade Vrhbosanske nadbiskupije i koja traži da se prostor oslobodi da bi mu se vratila nekadašnja namjena i u objektu đačkih domova koji je u prethodnom periodu bio korišten za smještaj izbjeglica. Ove dvije škole trenutno pohađa preko 1000 učenika, sa preko 120 zaposlenih. Izgradnja srednjoškolskog centra, koja je počela 2009 i čiji je plan za završetak bio godinu dana još nije završena. Odgovornost za neuspjeh, neispunjeno cilja i probijanje svih rokova se prebacuje sa jednog na drugi nivo, od Općine, SBK do FBiH. Ponižavajuće je da se naša djeca školuju u uslovima ispod svake razine ljudskog dostojanstva. Koaliciji „Naša travnička priča“ će rješavanje ovog problema imati najveći prioritet. Radit ćemo na nabavci sredstava za završetak izgradnje:

1. kroz saradnju sa zainteresovanim investitorima/donatorima iz drugih zemalja koji su već ranije pokazali interesovanje i ponudili moguće načine saradnje
2. ili kroz kreditna zaduženja (koja bi se mogla vraćati tako što bi sredstva koja se daju za iznajmljivanje prostorija koja koriste SBK i Mješovita srednja škola u Travniku preusmjerili u otplate rata kredita a Mješovitu srednju tehničku tehničku školu

prebaciti u srednjoškolski centar a zgradu Mješovite srednje tehničke škole i/ili đački dom dati na korištenje SBK)

- podržati rad gradske biblioteke - Pomoći ćemo proširenje djelatnosti biblioteke u turbetskoj i biljanskoj regiji i organizovati ćemo program redovnih posjeta predstavnika biblioteke svih osnovnim školama u opštini u okviru kojih bi se promovisale aktivnosti i projekti koje biblioteka radi

1.13 Sport

Značaj strateškog razvoja sporta, i individualnog i timskog, i profesionalnog i amaterskog, gledamo u više segmenata, kako u kontekstu fizičkog i mentalnog razvoja djece i mladih, tako i u kontekstu rekreativnog sadržaja za odrasle, te alata za promociju lokalne zajednice van njenih granica. Ulagat ćemo u razvoj sportske infrastrukture, izgradnju i obnovu sportskih dvorana, sala za tjelesni odgoj u školama u kojim nedostaju, izgradnju multifunkcionalnih sportskih ploha na otvorenom, teretana na otvorenom, šahovskih ploha i dr. Pored podrške i sponzoriranja značajnih sportskih manifestacija, te podrške profesionalnom sportu i reprezentacijama koje nas predstavljaju na međunarodnom nivou, posebno smo zainteresirani – a sa ciljem omasovljavanja sportskih aktivnosti među građanima – za razvoj amaterskog i školskog sporta, te smo odlučni, ne samo kroz kratkoročne finansijske podrške pojedinačnim manifestacijama, podržati i razvoj ovog vida sporta u programskom smislu: kreiranju i redovnom organiziranju sportskih amaterskih takmičenja (liga, turnira), uz poticajni sistem nagrađivanja, zatim škole trčanja, streljaštva, skijanja, te druge slične rekreativne aktivnosti. Jedan od prioriteta nam je omogućiti u svim osnovnim školama besplatne sportske sekcije i škole sporta.

Sport u Travniku je već duži niz godina na najnižim mogućim granama. Iako se kroz budžet odvaja ogroman novac za ovu oblast, čini se da on nije adekvatno raspoređen i da često finansijsku podršku ne dobijaju oni koji je najviše zaslužuju. Ova oblast je apsolutno ispolitizirana i u Upravnim odborima travničkih klubova nalaze se isključivo stranački podobni ljudi koji apsolutno zloupotrebljavaju svoje funkcije u travničkim sportskim kolektivima na najrazličitije načine. Najčešće su to ljudi bez apsolutno ikakvog sportskog iskustva i sportskih referenci koje politika stavlja na te pozicije radi sprovođenja ličnih interesa.

Koalicija „Naša travnička priča“ ima pripremljen plan aktivnosti za djelovanje koji podrazumjeva zalaganje za slijedeće:

- Prioritet je završetak sportsko-rekreacionog centra Pirot. U ovu prije rata započetu dvoranu do sada je uloženo ko zna koliko sredstava, a ona nije još ni blizu završetka i puštanja u pogon u punom kapacitetu. Neophodno je podnijeti finansijski izvještaj da se vidi koliko je novca do sada utrošeno u ovaj projekat i koliko je potrebno da se stavi u potpunosti u pogon. Odrediti dinamiku radova do završetka projekta. Pronaći izvor finansijskih sredstava, da li izdavanjem dvorane pod koncesiju na određeni vremenski period privatnom investitoru uz obavezu završetka radova i dovođenja u finalno stanje, ili kreditnim zaduživanjem općine Travnik obezbijediti sredstva i dvoranu što prije pustiti u pogon.
- U Sportski savez općine Travnik je neophodno da uđu ljudi od struke kao i afirmisani sportisti i sportski radnici, koji će u koordinaciji sa općinom Travnik praviti plan razvoja

- sporta, utjecati na pravilno raspoređivanje finansijskih sredstava u budžetu na osnovu sportskih uspjeha i određenih kriterija.
- Vratiti sport sportistima u punom smislu te riječi. Omogućiti afirmisanim sportistima i sportskim legendama u Općini Travnik da budu u rukovodstvima sportskih kolektiva i potpuno depolitizirati ovu oblast.
- Akcenat dati na razvoj omladinskih pogona sportskih kolektiva i maksimalno ulagati u taj segment.
- Podjednako sredstva raspoređivati na cijeloj Općini Travnik bez privilegovanih, nego isključivo na bazi sportskog uspjeha, članstva i postavljenih parametara.
- Jačati infrastrukturu klubova u vidu poboljšanja uslova rada i potrebnih materijalno-tehničkih sredstava.
- Poboljšati uslove rada u osnovnim i srednjim školama na području općine Travnik kada je u pitanju nastava tjelesnog i zdravstvenog odgoja.
- Inicirati sportske igre mladih i male olimpijske igre na nivou škola sa područja općine Travnik i planirati u budžetu takve manifestacije.
- Afirmisati ribolovačka društva u Općini Travnik
- Prilikom planiranja budžeta i strategije razvoja sporta, obavezno odrediti sportove koji su od strateškog značaja za Općinu Travnik i koji imaju tradiciju. Uzeti u obzir rezultate koji su ostvarivani kroz istoriju (dobar primjer je rukomet) kao i podneblje koje pogoduje razvoju određenog sporta (zimski sportovi).

1.14 Kultura

Kultura je oduvijek bila važan pokretač razvoja jedne zajednice i društva. U saradnji sa kulturnim djelatnicima kreirali smo program za kulturu koncipiran na europskim modelima lokalnih kulturnih politika i participacije građana u oblasti kulture. Program ima više ciljeva i aktivnosti.

Ciljevi:

- Osigurati veću participaciju građana i dostupnost kulture u cijeloj Općini Travnik;
- Omogućiti adekvatne uvjete za rad kulturnim stvaraocima;
- Očuvanje kulturne baštine;
- Disperzija kulture u svim dijelovima Općine Travnik;
- Modernizacija javnih ustanova u oblasti kulture;
- Poticanje na razvoja amaterske kulture i udruženja;
- Poticati razvoj savremene produkcije i inovativnosti;
- Razvoj programa za mlade i djecu;
- Jačanje intersektorske saradnje;
- Razvoj festivala i manifestacija, jačanje ponude kulturnih sadržaja;
- Razvoj kulturnog turizma;
- Poticati međunarodnu saradnju i mobilnost umjetnika;
- Investirati u kulturnu infrastrukturu.

Aktivnosti:

- Usvojiti strategiju za kulturu Općine Travnik kao strateško promišljenje javne uprave u oblasti kulture;

- Osnovati savjetodavno vijeće za kulturu i uključiti u odlučivanje kulturne radnike;
- Pokrenuti specijalizirani portal za promociju lokalne kulture;
- Transformisati organizaciono javnih ustanova u moderne kulturne ustanove;
- Izgraditi novu zgradu Gradske biblioteke, renovirati zgrade Zavičajnog muzeja Travnik, Centra za kulturu Općine Travnik i Hrvatskog kulturnog centra Nova Bila;
- Uvesti kulturne programe u svim MZ Općine Travnik i obnoviti postojeće domove kulture;
- Povećati budžet za kulturu i pokrenuti fond za stipendiranje mladih umjetnika;
- Razvijati javno-civilno partnerstvo sa nezavisnom kulturnom scenom putem ustupanja javnih prostora;
- Programski transformisati postojeće festivalne i pokrenuti posve novi, programski autentičan festival;
- Osnovati Omladinski kulturni centar kao integralni dio postojećeg Centra za kulturu;
- Pokrenuti stalni rezidencijalni programi za umjetnike izvan Općine Travnik;
- Razvijati programe kulturnog turizma putem uvođenja priopćjedackih tura osmišljenih u saradnji sa uredom za turizam.

1.15 Očuvanje životne sredine

Zaštita okoliša mora postati jedan od prioriteta. Odlučno se protivimo proširenju građevinskih zona na zelene površine te svim drugim manipulacijama prostorom koje kao isključivi cilj imaju brzo bogaćenje beskrupuloznih pojedinaca i grupa, a često imaju pogubne posljedice za okoliš. Ovo se posebno odnosi na izgradnju mini hidroelektrana, posebno na rijeci Ugar gdje je uviđeno dosta nepravilnosti i nedostataka ali za što su se ipak pribavila dokumenta koja su izdata za samu izgradnju hidroelektrana. Zalagat ćemo se da ukažemo nadležnim na propuste koji su načinjeni u izradi dokumentacije, izdavanju dozvola i samoj izgradnji hidrocentrala i bit ćemo protivnici izgradnji novih mini hidroelektrana.

1.16 Sigurnost i civilna zaštita

Osnovni ciljevi:

- savremeni sistemi nadzora javnog prostora
- podrška radu policije u zajednici
- podrška projektima podizanja svijesti o prevenciji i sigurnosti građana
- jačanje sistema civilne zaštite
- unapređenje kontrole i upravljanja migrantskom krizom
- podrška humanom uklanjanju nezbrinutih pasa s ulica

Iako lokalne zajednice u BiH ne mogu biti ekonomski i infrastrukturno razvijene kao gradovi i općine zapada, smatramo da je moguće napraviti neke druge komparativne prednosti za ugodno življenje u njima. Jedno od najznačajnijih pitanja je sigurnost. Uz sredstva koja su na raspolaganju lokalnim samoupravama, moguće je, kroz investiranje u nove tehnologije i široku pokrivenost sistemima nadzora (video, osvjetljivanje i sl.), postići visok nivo zaštite i sigurnosti građana. Stoga smo riješeni u tom smjeru izdvajati značajna sredstva i finansirati projekte ove vrste. Pitanje sigurnosti u saobraćaju obradili smo u jednom od prethodnih poglavlja

(prostorno uređenje). Pored tehničkih rješenja, želimo uspostaviti kvalitetnu saradnju između općine i policijskih struktura, a sa ciljem osiguravanja stalnog policijskog prisustva na lokacijama gdje je to neophodno.

Poseban fokus stavit ćemo na prevenciju i rješavanje sigurnosnih problema građana nastalih uslijed migrantske krize.

Pandemija koronavirusa otkrila je brojne slabosti cjelokupnog sistema, posebno u sektoru civilne zaštite. Nedostatak obučenog kadra te manjak adekvatne zaštitne opreme kojem smo svjedočili, lekcija su da lokalne strukture civilne zaštite moraju biti pod određenim monitoringom općinskih uprava, a sa ciljem uske saradnje i pravovremene reakcije u slučajevima nedostatka kapaciteta, a prije neželjenih stanja nesreće i elementarnih nepogoda. Kada je riječ o prirodnim nesrećama, smatramo važnim pravovremeno i preventivno djelovati na sanaciji klizišta, uređenja riječnih korita s ciljem zaštite od poplava, nabavci potrebne opreme za odgovor na nepredviđene obimne sniježne padavine i požare i sl. Svi navedeni rizici jesu realne prijetnje s kojim se naša općina redovno susreće. Insistirat ćemo na stalnom praćenju i uvidu u stanje spremnosti struktura zaštite, te budžetom planirati stalna i dovoljna interventna sredstva za vanredne situacije.

Sigurnost građana u proteklom periodu je znatno narušavana zbog masovne pojave nezbrinutih pasa latalica na ulicama. Čvrsto smo opredijeljeni da u saradnji sa višim nivoima vlasti i strukom (veterinarskom) realiziramo trajno rješavanje ovog problema, uz institucionalni i zakonski pristup i humano uklanjanje i zbrinjavanje pasa latalica, tj. izgradnja skloništa za napuštene pse i obezbjeđenje potpune primjene odluke o komunalnom redu koja propisuje način čuvanja kućnih ljubimaca, te ozbiljna primjena svih sankcija prema neodgovornim vlasnicima.

Svjedoci smo u proteklim periodima koliko priroda svojim djelovanjem može da ugrozi našu životnu sredinu kako svojim djelovanjem kroz elementarne nepogode uzrokovane poplavama, zemljotresom, tako i djelovanjem različitih virusa koji postaju sve veća opasnost za naše građanstvo. Nužna je pripremljenost svih građana naše općine kroz pružanje različitih edukacija i obuka kako bi svaki građanin svojim ličnim doprinosom bio spreman djelovati u datim okolnostima.

Dodatak

U svom radu i djelovanju poštivat ćemo zakonske i podzakonske propise, Statut općine Travnik i Poslovnik o radu Općinskog vijeća Travnik, te ćemo aktivno raditi, u okviru datih nadležnosti, na poboljšanju ovih propisa, ali i inicirati izmjene i dopune postojećih zakonskih i podzakonskih rješenja kod nadležnih institucija u svim oblastima u kojima se njihova primjena u praksi pokazala kao nezadovoljavajuća i nepravedna.

Svakodnevno ćemo raditi na boljoj organizaciji i funkcionisanju općinske uprave, kao i poboljšanju kvaliteta usluga građanima i pravnim licima, uz olakšavanje, ubrzavanje i pojeftinjenje procedura.

Provodit ćemo sve potrebne aktivnosti s ciljem bolje i efikasnije saradnje sa građanima, privrednicima i privrednim subjektima, višim nivoima vlasti, stranim delegacijama i ambasadama, medijima,

domaćim, stranim i međunarodnim organizacijama, susjednim i drugim općinama i gradovima, gradovima iz drugih zemalja (posebno bratimljenim).

Posebno ćemo aktivno pomagati i finansirati rad mjesnih zajednica i njihovih predstavnika, uz česte posjete, prijeme, razgovore, sastanke, a s ciljem bolje saradnje, podrške, jačanja veza i njihovog efikasnijeg razvoja.

2 Projekti

Koalicija „Naša travnička priča“ odlučila je u svojoj izbornoj platformi i programima precizirati prioritetne projekte u našoj općini. Selektovali smo ih po primarnim oblastima, vodeći se realnim problemima i potrebama građana i upoznavanjem situacije na terenu. Projekti su numerisani, s ciljem jasnijeg pregleda i uvida u fokus našeg interesovanja i djelovanja prema određenoj oblasti. Time smo željeli građanima osigurati maksimalnu mjerljivost naših obećanja i alat svim zainteresiranim stranama za konstantni nadzor nad njihovim ispunjavanjem. Ovim pristupom pokazujemo da smo programski orijentisana politička organizacija, da naša politika nije temeljena na pukom populizmu i ispraznoj demagogiji od koje građani nemaju nikakve koristi, već na konkretnim projektima koji donose dobrobit u svakodnevnom životu.

2.1 Oblast: Transparentnost i antikorupcija

2.1.1 Projekt br. 1: Uspostava web-stranice „Javne nabavke Općine Travnik“

Kratak opis: Kreiranje platforme koja će građanima omogućiti uvid u sve detalje javnih nabavki, nosioce, vrsta postupka, iznose, ugovore i adendum ugovora, početak radova, rokove izvršenja ili isporuke i td.

Vrijeme implementacije: 2021

Potrebna sredstva: 15.000,00 KM

2.1.2 Projekt br. 2: Donošenje akcionog plana prevencije korupcije i borbe protiv korupcije

Kratak opis: Općina zajedno sa kantonom formirala antikorupcijski tim sa jasno naznačenim pravcima djelovanja. Potrebno je samo da se imenuju stručni ljudi u ovaj tim i da se postavljeni zadaci rješavaju kroz jasno definiran način monitoringa i evaluacije.

Vrijeme implementacije: 2021.

Potrebna sredstva: 5.000,00 KM

2.1.3 Projekt br. 3: Revizija poslovanja i reorganizacija komunalnih preduzeća Općine Travnik

Kratak opis: Uraditi detaljnu reviziju poslovanja komunalnih preduzeća:

- JKP Bašbunar Travnik
- JKP Trebišnjica Nova Bila
- SRC Vlašić

U skladu sa rezultatima revizije napraviti potrebne korektivne aktivnosti, uključujući i reorganizaciju preduzeća.

Vrijeme implementacije: 2021.-2022.

Potrebna sredstva: xxx KM

2.1.4 Projekt br. 4: Revizija poslovanja i reorganizacija PD Vlašić

Kratak opis: Obzirom na ogroman potencijal i općinsko zemljište kojim upravlja PD Vlašić i činjenicom da taj potencijal nije iskorišten od strane PD Vlašić (nepostojanje mehanizacije, nepovezanost poslovanja sa tržnim centrima u opštini i sl.), neophodno je uraditi detaljnu reviziju poslovanja i u skladu sa rezultatima revizije napraviti potrebne korektivne aktivnosti, uključujući i reorganizaciju preduzeća.

Vrijeme implementacije: 2021.-2022.

Potrebna sredstva: xxx KM

2.1.5 Projekt br. 5: Revizija poslovanja i reorganizacija JU Apoteke/Ljekarne Travnik

Kratak opis: Obzirom na neshvatljive gubitke u poslovanju koji pravi JU Apoteke/Ljekarne Travnik neophodno je uraditi detaljnu reviziju poslovanja i u skladu sa rezultatima revizije napraviti potrebne korektivne aktivnosti, uključujući i reorganizaciju preduzeća.

Vrijeme implementacije: 2021.-2022.

Potrebna sredstva: xxx KM

2.1.6 Projekt br. 5: Revizija poslovanja i reorganizacija JP Stan Travnik

Kratak opis: Napraviti detaljnu reviziju poslovanja JP Stan Travnik i u skladu sa rezultatima revizije napraviti potrebne korektivne aktivnosti, uključujući i reorganizaciju preduzeća.

Vrijeme implementacije: 2021.-2022.

Potrebna sredstva: xxx KM

2.2 Oblast: Budžet

2.2.1 Projekt br. 1: Izrada i promocija „Budžeta za građane“

Kratak opis: Kreiranje Dokumenta s pojednostavljenim prikazom budžeta i njegovih ključnih elemenata, s ciljem bolje predstavke i jasnijeg uvida građana u ovaj ključni dokument

Vrijeme implementacije: 2021, 2022, 2023

Potrebna sredstva: 10.000,00 KM

2.3 Oblast: Administracija

2.3.1 Projekt br. 1: Uspostavljanje „One stop shop“

Kratak opis: Jednošalterski sistem, sve na jednom mjestu, za realizaciju i prikupljanje svih potrebnih dokumenata/odobrenja u jednom procesu (biznis npr.)

Vrijeme implementacije: 2021

Potrebna sredstva: 40.000 KM na godišnjem nivou

2.3.2 Projekt br. 2: Pokrenuti proces digitalne transformacije javne uprave

Kratak opis: Započeti dugotrajan proces transformacije (promjenu svih oblika poslovanja i procesa u kojima su zaposlenici organizacije u interakciji s njezinim korisnicima.), sve u cilju bržeg pružanja servisa korisnicima. U okviru ovog procesa je potrebno:

1. Napraviti strategiju digitalne transformacije javne uprave
2. U institucijama javne uprave napraviti organizacione jedinice za IT i zaposliti ID stručnjake koji će raditi na digitalnoj transformaciji
3. Nabaviti IKT rješenja (Informatičkih i telekomunikacionih), po pojedinim fazama procesa digitalne transformacije
4. Organizovati podršku za unapređenje digitalnih vještina službenika na svim nivoima vlasti za korištenje novih dostupnih alata i uvrštavanje novih praksi u njihov rad
5. Kroz poticaje zadržati i privući IT stručnjake, koji su neophodni za uspješne projekte digitalne transformacije. Na svaki način olakšati proces registracije i poslovanja IT kompanija na području Općine

Vrijeme implementacije: 2021 - 2024 godina

Potrebna sredstva: ??? KM

2.4 Oblast: Strateško planiranje

2.4.1 Projekt br. 1: Analiza potreba tržišta rada u Općini

Kratak opis: Istraživanje i izrada registra potreba privrede za određenim kadrovima, te komparacija sa smjerovima u obrazovanju koji pohađaju učenici i studenti s područja općine

Vrijeme implementacije: 2021

Potrebna sredstva: 20.000 KM

2.4.2 Projekt br. 2: Osivanje opštinske službe za potrebe planiranja i izrade strateških prjekata te apliciranje prema domaćim i inostranim fondovima.

Kratak opis: Općina Travnik mora da iznalaziti nove metode punjenja budžeta te je nužno osnivanje nove službe uz zapošljavanje stručnog kadra / projekt menadžera. Projekt menadžeri bi kroz svoje iskustvo u projektovanju i poznavanjem rada domaćih i međunarodnih fondova ima li za obavezu da sve ili većinu infrastrukturnih ali i drugih projekata planiranih kroz budžet finansiraju i obezbijede. Ovakav način rada je primaran kod svih jedinica lokalne samouprave u zemljama evropske unije ali i zemljama regionala. Na ovaj način stvorio bi se prostor umanjenja administrativnih i drugih nameta građanima ali i dodatni način punjenja budžeta.

Vrijeme implementacije: odmah bez odlaganja

Potrebna sredstva: plaća za tri radnika i foriranje službe, cca 60.000.00 godišnje.

2.5 Oblast: Imenovanja

2.5.1 Projekt br. 1: Izrada registra svih imenovanih funkcionera i članova upravljačkih struktura institucija općine

Kratak opis: S ciljem transparentnosti i mogućnosti uvida javnosti u imena i stručnost/biografije svih rukovodilaca i članova uprava u institucijama, ustanovama i preduzećima općine, izraditi ćemo registar u elektronskoj verziji, s imenom, biografijom, datumom imenovanja, strankom ispred koje imenovani dolazi i td.

Vrijeme implementacije: 2021

Potrebna sredstva: 2.000 KM

2.6 Oblast: Mladi

2.6.1 Projekt br. 1: Osnivanje centra za razvoj preduzetništva

Kratak opis: Osnivanje JU CRP, Odabir zgrade u vlasništvo općine, izrada projekta „CRP“, adaptacija objekta i opremanje objekta, kapacitiranje JU CRP za normalan rad

Vrijeme implementacije: 2021/2022

Potrebna sredstva: 400.000,00 KM

2.7 Oblast: Djeca i porodica

2.7.1 Projekt br. 1: Rekonstrukcija vrtića „X“

Kratak opis: Zamjena stolarije i stavljanje termo-fasade na objekata „X“, s ciljem bolje izolacije i postizanja uvjeta za zdrav boravak najmlađih polaznika i osoblja vrtića, te postizanje bolje energetske efikasnosti objekta.

Implementacija:2021/2022

Potrebna sredstva: 135.000 KM

2.8 Projekt br. 2: Jačanje kapaciteta JU Centra za socijalni rad Travnik

Kratak opis: . osposobiti i staviti u potpunu funkcionalnost prihvratne stanice za žrtve nasilja u porodici i pružanja stručne pomoći i savjetovališta porodicama sa rizikom od razdvajanja sa 24 satnim radom.

Vrijeme implementacije:do kraja 2020 godine.

Potrebna sredstva: zapošljavanje medicinske sestre, socijalnog radnika, logopeda. Cca 50.000.00 KM na godišnjem nivou.

2.9 Oblast: Zdravstvo i socijalna skrb

2.9.1 Projekt br. 1: Osnivanje Centra za zdravo starenje

Kratak opis: Uspostava javne ustanove i izgradnja centra za zdravo starenje u naselju X, s ciljem omogućavanja boljih uslova za život penzionera.

Vrijeme implementacije: 2022/2023

Potrebna sredstva: 300.000 KM

2.10 Oblast: Privreda

2.10.1 Projekt br. 1: Izgradnja i opremanje centra za poljoprivredu i ruralni razvoj na lokalitetu Babanovac

Kratak opis: Centar bi imao funkciju praktične i teoretske obuke poljoprivrednih proizvođača vezano za savremene tehnologije, standarde u poljoprivredi, preradu poljoprivrednih proizvoda, marketing,zakonske regulative za proizvodnju, pakovanje i prodaju poljoprivrednih proizvoda. U okviru centra bi se izgradila pijaca za sve poljoprivredne proizvođače koji bi na jedan moderniji, kvalitetniji i zakonski sigurniji način mogli svoje autohtone proizvode ponuditi turistima. Centar bi bio u mogućnosti organizirati i prekvalifikaciju ljudi uz izdavanje certifikata. Centar bi bio samoodrživ.

Vrijeme implementacije:2021-2024

Potrebna sredstva:500.000 KM

2.10.2 Projekt br. 2: Poticanje lokal patriotizma kroz kampanju "Kupujmo travničko"

Kratak opis: Cilj projekta je u suradnju sa privrednicima građanima naše općine približiti sve proizvode i usluge koji se proizvode u našoj općini a od kojih se mnogi mogu kupiti sirom EU i ostatka svijeta sa posebnim akcentom na mlađe ljude od kojih mnogi nisu upoznati sa privrednim potencijalom naše općine

Vrijeme implementacije: 2022 - 2024

Potrebna sredstva: 30 000 KM

2.10.3 Projekt br. 3: Izgradnja putne infrastrukture u industrijskoj zoni „X“

Kratak opis: Finalizacija cijelokupne putne mreže u industrijskoj zoni „X“, a s ciljem omogućavanja daljnog širenja zone i izgradnje novih poslovnih objekata i proizvodnih pogona

Vrijeme implementacije: 2022-2024

Potrebna sredstva: 600.000 KM

2.11 Oblast: Razvoj i upravljanje prostorom

2.11.1 Projekt br. 1: Led-rasvjeta

Kratak opis: Širenje rasvjete mreže i zamjena postojeće led-rasvjetom, a s ciljem ušteda i ekološke opravdanosti.

Vrijeme implementacije: 2021/2022

Potrebna sredstva: 800.000 KM

2.11.2 Projekt br. 2: Formiranje sportskog igrališta za djecu sa prirodnom travom i u prirodnom ambijentu

Kratak opis: Na žalost svjedoci smo da je u našem gradu usurpirana svaka površina koja je bila namijenjena dječjem igralištu kada govorimo o sportskim aktivnostima. Poznata „Gimnazija“ je pretvorena u parking, igrališta napravljena kod zgrade „Đerdan“ nisu ni po kakvom propisu čak ne odgovaraju niti djeci najmanjeg uzrasta, sportsko igralište tzv „rukometno igralište“ je prepušteno zubu vremena i devastirano je. Naša djeca nemaju gdje da se zdravo i normalno razvijaju. Imamo obavezu da im to obezbjedimo i to na način da ih odvojimo od betona i buke te pripremimo igralište sa prirodnim ambijentom i u prirodnom okruženju.

Vrijeme implementacije: 2021 godina.

Potrebna sredstva: 40.000.000 KM

2.11.3 Projekt br. 3: Uređenje turističke lokacije „Plava voda“ – Povezivanje sa srednjovjekovnom tvrđavom

Kratak opis: Povezivanje turističkih lokacija – Plava voda i srednjovjekovna tvrđava. Postojeći putevi (Hendek, Musala ili preko Žitarnice pa uz Varoš) su nesređeni ili neadekvatni za veliki broj turista čiji obilazak obično kreće iz ulice Šumeće. Idealno rješenje bi bilo da se ponovo otvori put koji vodi od Plave vode direktno na Stari grad, naravno uz odgovarajuću adaptaciju puta i zaštitu izvorišta Plave vode. Turisti bi, nakon Starog grada, svoj obilazak nastavili ulicom Varoš do Žitarnice.

Vrijeme implementacije: 2021/2022

Potrebna sredstva: ??? KM

2.11.4 Projekt br. 4: Uređenje izgleda turističke lokacije „Plava voda“

Kratak opis: Uređivanje izgleda turističkog lokaliteta Plava voda. Prodajni objekti – štandovi, moraju biti jednoobrazni i locirani na određenim lokacijama, bašte ugosistelskih objekata je potrebno ograničiti na za to predviđene prostore, devastirane objekte na ovom lokalitetu je potrebno renovirati (općinske objekte kroz odluke OV a objekte u privatnom vlasništvu podsticajima i u dogовору са власnicima)

Vrijeme implementacije: 2021/2022

Potrebna sredstva: ??? KM

2.11.5 Projekt br. 5: Rješavanje problema parking prostora za stanare MZ X

Kratak opis: Promjenom regulacionog plana 2017. godine, u svim ulicama u Travniku je primjetan problem nepostojanja parking mjesta za mještane. Neophodno je odrediti više parking mjesta samo za stanare.

Vrijeme implementacije: 2021/2022

Potrebna sredstva: ??? KM

2.11.6 Projekt br. 6: Proširenje turističke ponude

Kratak opis: U Općini Travnik ima mnogo lokaliteta i potencijalno jako interesantnih turističkih lokacija u koje bi se moglo i trebalo investirati da bi se proširila turistička ponuda iskrištenja dodatnih lokacija za turiste (npr. „Stara cesta“, Hašanpašića kula u Osoju, itd.). Sa turističkom zajednicom potrebno napraviti strategiju razvoja i revitalizacije ovih lokacija

Vrijeme implementacije: 2021/2022

Potrebna sredstva: ??? KM

2.12 Oblast: Kultura i sport

2.12.1 Projekt br. 1: Izgradnja sportsko-rekreativne zone na lokaciji „X“

Kratak opis: Izgradnja multifunkcionalnog centra na platou brda „X“, s infrastrukturom za realizaciju sportkih, rekreativnih i kulturnih sadržaja, po uzoru na centar Safet Zajko u Općini Novi Grad

Vrijeme implementacije: 2021-2024

Potrebna sredstva: 2.000.000 KM

2.13 Oblast: Obrazovanje

2.13.1 Projekt br. 1: Obezbeđivanje finansijskih sredstava sa viših nivoa vlasti za završetak izgradnje srednje škole u Travniku

Kratak opis: Izgradnja srednje škole u Travniku traje već petnaest godina, a završetak izgradnje je neophodno potreban kako bi njeni učenici konačno dobili adekvatan prostor za školovanje i obrazovanje, ali i iz razloga provođenja domaćih i međunarodnih presuda

Vrijeme implementacije: 2020., 2021.

Potrebna sredstva: _____

2.13.2 Projekt br. 2: IT-kabinet u Osnovnoj školi X

Kratak opis: Uspostava i opremanje savremenog kabineta za izučavanje savremenih tehnologija u školi „X“

Vrijeme implementacije: 2021

Potrebna sredstva: 150.000 KM

2.14 Oblast: Sigurnost i civilna zaštita

2.14.1 Projekt br. 1: Travnik pod video nadzorom

Kratak opis: Uspostavljanje video-nadzora u ulicama blizu škola, puteva kojim djeca idu u školu, obdaništa i gdje pripadnici MUP-a odrede lokaciju s ciljem smanjenja krivičnih djela i sigurnosti.

Vrijeme implementacije: 2022-2004

Potrebna sredstva: 200.000 KM

2.15 Oblast: Infrastruktura

2.15.1 Projekt br. 1: Nadvožnjaci

Kratak opis: Izgradnja Nadvožnjaka na potezu Zelena pijaca - Parnjače koji će zadovoljavati sve zakonom predviđene mjere i visinu koja neće ometati saobraćaj na dionici Magistralnog puta M-5 kroz centar općine Travnik a u isto vrijeme će biti pomoći građanima Travnika koji obavljajući svakodnevne poslove moraju čekati i paziti prilikom prelaska ceste na ovoj dionici M-5.

Vrijeme implementacije: 2022-2024

Potrebna sredstva: KM

2.15.2 Projekt br. 2: Uređenje autobusnih stajališta

Kratak opis: Potrebno je odrediti precizne lokacije autobusnih stajališta na cijeloj teritoriji općine Travnik, kao i u samom gradu za potrebe gradskog saobraćaja, te izvršiti uređenje istih u smislu postavljanja nastrešnica, klupa, kanti za otpatke i slično. Na mjestima gdje je to moguće izvršiti izmještanje autobusnih stajališta sa površine kolovozne trake u cilju bezbjednosti putnika i ostalih učesnika u saobraćaju.

Vrijeme implementacije: 2021

Potrebna sredstva: KM